



Nunatsinni umiarsuarni aqumiutut ilinniarsimasut suliffissaqarnikkut periarfissaat qanoq pitsaanerulersinneqarsinnaanersut qulaajarumallugu apeqquteqqaat aallaavigalugu oqallinnissamik siunnersuut.

(Inatsisartunut ilaasortat Saxtorph Didriksen aamma Lars Mathæussen, Siumut)
(Siullermeerneqarnera)

Demokraatini tatigaagut Naalakkersuisut oqarmata aalisariutini inuttat pillugit malittarisassat eqqortumik malinneqartut. Aamma tatigivarput eqqortoq, Naalakkersuisut oqarmata, umiarsuarni aqumiunik sulisussarsiniarneq aalisariutaatillit ajornartorsiutigisaraat. Sulisussanik pissarsisoqarsinnaanngikkallartillugu kukkuneruvoq oqallisigissallugu, qanoq iliornikkut aqumiut nunaqavissut sulilernissaannut periarfissat pitsaangorsarneqarsinnaanersut. Isumaqarpugut paarlattuanik oqallisigisariaqaripput, aqumiutut ilinniarneq qanoq iliorluta pilerinarsarsinnaaneripput.

Demokraatini tamanna tunngavigalugu nuannaarutigaarput, aalisariutaatillit namminneq paasititsiniaanialermata aqumiunik amerlanerusunik pissarsiumallutik. Nersortariaqarpoq aalisariutaatillit misigisimammata akisussaaffigalugu kalaallit aalisariutaataat kalaallinik aqumioqartariaqartut aamma Demokraatit tungaanniit Kalaallit Nunaanni Sulisitsisut Peqatigiiffiat Imarsiornermik Ilinniarfik, Polar Seafood, Royal Greenland, Royal Arctic Line aamma Sermilik qutsavigerusuppagut suliniummik taamaattumik aallartitsisimammata.

Neriuppugut aamma upperaarpud siunissami nunaqavissunik aqumiunik eqqortunik piginnaanilinnik aalisariutaatillit sulisussarsiortarnerat ajornaannerulerumaartoq.